

**Naul nga Pol Muli tevi
Kalesia Nir renge
KOLOSI
Batu nale nga mivsivseni lut
nga parmeteni naul ngel
puto suri**

Pol oli naul ngel tevi kalesia nir nga marlik renge Kolosi, ngaim san ie Esia. Oli suri nevisvisenien gerisen san nga miplari jir. Nir nga marvisviseni nevisvisenien gerisen nen arwera jinibb nir parosuri anglo nir ko parosuri kele nale wowarreng elep nga marto renge nale nesesreien rreknga lo (law) se Moses, ko niko parongwose weretunen Atua vajin. Ko Pol owra Iesu Kristo esan okla mauren tevi jinibb, ko daron nga marvijuri nale gerisen ngok ko aruj ngasu kobbong e ni. Ko ospē kele suri mauren ser nga marlai renge Kristo, ko pirpese renge mauren ser vajin renge nabong jijle. Ko daron nga muli jile naul ngel, ko elai tevi selen Tikikas putori van jir. Ko Onesimas kele eptevi Tikikas, suri re wosenen Pol okoni ni pulwi van ji numal sen Pilimon.

Pol owra erres tevi nir

¹ Inu Pol nuvi aposol se Iesu Kristo renge marongen se Atua. Tevi Timoti tasi kerr,
² nomoruli naul ngel tevi kami mēri Kolosi nga

kamivi tasi komru renge Kristo, ko nga kamosuri mĩrres renge sel nga muon. Nurongwos mae, merrenien ko demat se Atua Tata se kerr piptevi kami.

Pol owra erres tevi Atua suri nir

³ Tetajer daron nga nomorok-verus suri kami, ko nomorok-wera ‘erres’ tevi Atua, Tata se Numal se kerr Iesu Kristo. ⁴ Suri nomorunge pa nospen nen nga kami kamosuri Iesu mĩterter, ko kami kammerreni temijpale kalesia nir. ⁵ Kami kamok-loli murrun ngok suri nga kami kamok-lingi norrorrmien se kami oto eterter renge nanu nir nga Atua mĩlengi tera kami re melrin. Nanu ngok nir, kamrunge pa nospen ner womu daron nga kamrunge nospen ne nale weretunen suri Kristo. ⁶ Nospen ngok ejpari kami pa osuw. Ko etajer malum, pĩla wenen renge ngatan ngel totoklai, pusorsan tevi nga miwen pa ji kami musuw, mĩtipatun re daron nga kamrunge e, ko kamrongwose weretunen merrenien se Atua. ⁷ Kamrungrunge womu pae nanu ngel nir ji Epa-pras, nga mivi sele kerr san nga nomormerreni. Ni evi jinibb nga mokmajing lilane mĩrres se Kristo tevi kami. ⁸ Ko ni owrai pa tevi komru merrenien nga Nemĩn On mĩlai pa tevi kami.

Verusen se Pol suri nir

⁹ Ko suri nospen ngok ne kami, ololi komru nomorverus suri kami tetajer, mĩtipatun renge daron nga komru nomorunge. Komru nomorok-ngoni tevi Atua nga Nemĩn On puloli kapivi jinibb nga kaplesi wose, ko puloli kami kaprong-wos alje marongen se Atua. ¹⁰ Ko ngok, liken

se kami pumomsawos ãirres vajin pirpe Numal mimrreni. Ko puloli mauren se kami wenen putoe renge majingen nga marres nga kamoklolir, ko puloli kami kaprongwos temijpal kele wore Atua. ¹¹ Ko kapterter ãetãeti pusorsan tevi derteren nga milep se Atua, nga puloli kami kaptur ãiterter tetajer malum renge nanu nga marsij nga marok-ini. Ko kaãir bbong. ¹² Ko kapwera vajin ‘erres’ tevi Tata suri nga muloli kami kamviter kaplai pivsivses nanu nga marres nga ãilngi kortonir nga marto tera jinibb sen nir, re lat nga moron kis muto ren. ¹³ Ko Atua etka tweni kerr pa renge derteren ne nemalik, elngi kerr renge batun vanu se Natun nga mimrreni. ¹⁴ Ko ojri lweni kerr suri Kristo, erpe etlasi tweni nololien se kerr.

Kristo evi batu nanu jile nga Atua mulolir

¹⁵ Sete jinibb san orongwos ãilesi Atua. Ko Kristo ma, rramlesi pa Atua ren, suri ni osorsan ãetãeti tevi Atua. Ko Kristo owomu re nanu jile nir, ¹⁶ suri Atua elngi re nevre Kristo nga ni puloli nanu jile parpelari; nanu nga marto re melrin ko nanu nga marto iel ngatan, nanu nga rramlesir ko nanu nga sete rramlesir, ko derteren jile se anglo nir ko se jinibb. Ni lolir, ko arivi sen ko wor. ¹⁷ Ko ni owowomu re nanu jile, ko nanu jile arto kokorti erres re ni kobbong.

¹⁸ Ko kalesia nir arirpe nibe Kristo, ko ni erpe batur. Ni owowomu renge kalesia nir; ni emaur wowomu re mijen, nga puwowomu re nanu ãetãeti. ¹⁹ Suri Atua eir nga ãilngi mauren sen jile renge Kristo, ²⁰ ko eir kele nga Kristo pivi

nevren nga puloli ore lolaren se Atua pusuw jerjer. Ko Kristo ololi vajin nanu jile arkorti erres luwi tevi Atua, poro parivi nanu ne melrin nir rreknga nanu ne ngatan ngel. Ololi demat ngok suri drra ne mijen sen nga m̄iseser renge nai pelaot.

Kaptur p̄iterter renge murrun ne nosurien

²¹ Ko bonevis sapon, kami Atua kamturtur telur e kami, ko kamivi devje nuval se Atua, ko kamok-loli majingen nga marsij nir. ²² Ko lelingen ngel vajin, suri Kristo ololi niben erpe jinibb ko emij suri kerr, niko muloli kerr rramkorti luwi tevi Atua. Ko ololi kami kele kamivi jinibb on nga marwokwok, ko jinibb sete parongwos parokwor suri kami. Ko Kristo pia-pitevi kami pirpok van re no Atua. ²³ Ko ni puloli pirpok poro bbong kaptur p̄iterter renge murrun ne nosurien. Sete kaptur m̄emav, ko sete kapruj lingi nanu nga kamok-tiriv tweni nga marsuḗe renge nosḗen nga m̄irres nga kamrunge pa. Nosḗen ngok, arwerwer ren tevi jinibb jile nga melrin m̄isalsal orer. Ko inu Pol nuvi jinibb nga m̄emajing ren.

Pol erpe jinibb nga m̄imajing se kalesia nir

²⁴ Nomok-runge esij elep renge naim ne nekaien ngel. Ko nuir kobbong, suri erpe nuwosi luwe norongen nga m̄isij se kami renge inu nibek. Kristo kele ornge esij elep daron nga ni m̄ilik iel ngatan. Ko jinibb sen jijle nir arirpe vajin ni niben, ko nir kele parunge p̄isij ko wor iel ngatan. Ko erpe inu nuwosi luwe sapon norongen nga m̄isij se kami. ²⁵ Ko inu nuvi jinibb

nga mok-majing se kalesia. Majingen ngok, Atua ko elngi re inu nevrek nga ßemajing jile e suri kami. Ko majingen suk evi nga bowrai tweni nale sen puto limjer.

²⁶ Ko nale ngok oto teptepi sia ko sia renge dul ko dul, ko lelingenok vajin Atua ololi eplari limjer jile ji jinibb sen nir. ²⁷ Atua emrreni piviseni tevir nale sen nga muto teptepi ngok, nga musþe suri nanu san nga mïrres temijpal nga miplari pa musuw renge jinibb ne vanu jïjle nir, ngok: Kristo elik pa re kami, ko kamtiriv tweni vajin nga kapa-korti re nosrövien sen.

²⁸ Kristo ngok, namok-werwer ren. Nam-susur metue jinibb jile ko namok-visviseni jinibb jile renge norongwosien jile nga murrow nga nabpitevi jinibb jile nir partera þirres þetþeti renge Iesu van ji Atua. ²⁹ Nuþlak tweni nanu ngok, nurat suri renge derteren sen nga mïterter nga moklai tevik.

2

Rraposuri þiterter Kristo

¹ Numarong kaprongwose nga nurat temijpal suri kami ko suri mïeri Laotisia nir, ko suri nir jile nga sete marlesi wos wore nibek ko nok.

² Nurat suri nga nolor þiterter ko pumolmol nga parkorti þirres renge merrenien. Ngel evi nanu nga mïrres þelak san: numrreni parongwos alje, parongwos þirres nga þirres kemkamë Kristo, nga bonevis nosþen nen oto teptepi ji Atua. ³ Ko Atua esilveni renge Kristo norongwosien totoklai nga marres.

⁴ Nomok-suŕe nanu ngok suri jinibb sopor arok-loli ler erres, ko tarkerkerasi kami. ⁵ Nulik ngasue kami reŕge nibek, ko reŕge neŕik ma, nukorti tevi kami. Ko nuir nga ŕnelesi kamtur vivöŕgsur ko kamtur ŕŕiterter reŕge nosurien se kami reŕge Kristo.

Mauren se kami ŕirres ko wor reŕge Kristo

⁶ Erpok, kamlai pa Iesu Kristo evi Numal se kami. Kaploli mauren se kami totoklai vajin piptevi ni. ⁷ Kaprrul totkoni ni ŕiterter, pirpe laŕe nai murrul totkoni dan, ko kaptur ŕiterter ren pirpe naim san nga mutur ŕiterter reŕge dan. Ko nosurien se kami pivini ko wor ŕiterter malum tetajer, pirpe nga marvisviseni kami pae. Ko kapwera ‘erres’ temijpal wor tevi Atua. ⁸ Kami kapmetmet ŕirres, lartul ngok nir tarrul totkoni kami re nale nawon ser ko gerisen ser nga marvijuri norrorrmien nawon se jinibb nir, ko sel ne nevisvisenien ne ngatan ngel nir. Sete arvijuri sel se Kristo.

Kristo kobbong evi batu jinibb nir ko anglo kele nir

⁹ Kristo niben otoe erpe jinibb, ko mauren totoklai se Atua elik ren. ¹⁰ Ko kami kele, daron nga kamkorti tevi ni, ko kamlai mauren totoklai. Kristo owowomu re Numal ŕetŕeti nir ko derteren ŕetŕeti nir. ¹¹ Ko erpok kele, daron nga kamkorti tevi ni, erpe kaman re pa bae ko osuw. Ko iok, sete nusŕe suri bae nga norman mian ngalu marevji, ko nusŕe suri bae nga Kristo mirevji tweni murru nalol nga ŕisij reŕge mauren se kami. ¹² Ko daron nga marpaptae

kami, erpe artevni kami tevi Kristo. Ko erpok kele, daron nga kamtawij luwi re nuwi ngok, erpe kammaur luwi tevi Kristo renge mijen, suri kamosuri Atua nga derteren sen ololi Iesu mimaur luwi re mijen.

¹³ Ko erpe kami kammij pin renge nololien se kami ko renge murrun nga m̄isij se kami. Ko lelingenok vajin, Atua ololi kami kammaur luwi tevi Kristo. Ni etlasi tweni nololien jile se kerr, ¹⁴ ko olokloksi nanu nga maruli kortoni martere kerr tevi nale nesesreien nga marwer ore kerr rer, ko ela tweni p̄etp̄etir ko owser renge nai pelaot tevi Kristo. ¹⁵ Renge nai pelaot ngok, Kristo obbri otvi derteren se jinibb nga marlelep nir ko jinibb nga marwowomu nir renge devjen se Demij. Kristo otorrlair pa osuw, ko ololi tevir erpe Numal san nga mutorrlai devje nuval sen musuw, ko ololi nor arsi, nga jinibb arongwos parmetenir.

Kristo evi batu kami

¹⁶ Ko lartul ngok arwera parwer lokloksi kami suri nanen lele nga kamrroi, ko nanu lele nga kammini. Ko arwera kele kamloli esij nga sete kamtori nabong sopor, ko sete kamtori nanen ne nav̄ol muwut rrongvi, ko sete kamtori murrun ne nabong ebutun, nga marmosi ren. Ko sete kapmarong parij p̄irpok, pijki. ¹⁷ Nanu ngok nir, m̄eri Isrel nir arvijuri tuwi. Ko arjuji bbong Kristo. Ko daron nga Kristo mivini vajin, rramlesi vajin ni sel sen nga m̄irres p̄elak asi nanu ngok nir. ¹⁸ Lartul ngok nir, norrorrmien ser ean pa mare osuw, suri arlesi nanu sopor

re bori ser. Ko arkerkerasi jinibb nir, arwera jinibb nolor pian wor ngatan ko, ko parsurövi wor anglo ko nir. Sete kaplinglingi nir parwer lokloksi kami, parwera kamsij renge nanu ngok nir. Norrrormien ser ean mare temijpal, ko pesveni ko. Arok-rrorrmie nanu ngok nir suri murru jinibb kobbong nir. ¹⁹ Ko setemun artori Kristo eterter, ko ni mawos ma evi batu jinibb sen nir. Ko jinibb sen nir arirpe ni murru niben nir nga marokla nanen ser renge batun, suri nau ko murrurmurr arjipjipi erres re niben. Ko erpok vajin, Atua orongwos puloli niben totoklai pimaaur rujruj pilep ãirres.

Mauren nga mimerr renge Kristo

²⁰ Kami erpe kammij pa osuw tevi Kristo. Kamivi vajin jinibb nga kamiel sisarow osuw, setemun nevisvisenien ne ngatan ngel nir arrowsi kami. Ko erpese kamok-vijuri malume murrun ne ngatan ngel? Erpese kamvijuri nale nesesreien ne ngatan ngel nir, nga muwra: ²¹ ‘Sete kaptori nanu ngok ko nanu ngok’, ‘Sete kaproi nanu ngok ko nanu ngok’, ‘Sete kapjipari nanu ngok ko nanu ngok?’ ²² Ko iok arsuþe suri nanu nga partorir ko parsij bbong. Ko nale nesesreien ngok ko nevisvisenien ngok arivi se jinibb kobbong. ²³ Nale ser ngok, rramlesi rrongvi erpe erres, erpe eviseni norongwosien erres þelak, suri osoni jinibb nga parlot, ko nga nolor pian ngatan, ko nga partor ore þiterter murrun nga marmerreri karkar nanu nga marsij nir. Ko nesesreien ngok nir, derteren ser ejki rres nawone nga partor ore weretunen nanu nga

nolo jinibb mok-merrmerreni sarrsarr nir. Ko rramlesi, daron nga rramvijuri sel ser, murrun nga ñisij ngok oto erpok malum kobbong.

3

¹ Kami, erpe Atua ololi kammaur luwi re mijen evesane tevi Kristo. Ko niko, kapþelak suri nanu nga marto re melrin tevi Kristo, nga ñisakel pa re Atua nevren rres. ² Kami kaplingi norrorrmien se kami ko wor puto re nanu nga marto re melrin nir, setemun kapok-rrorrmii nanu ne ngatan ngel nir. ³ Suri erpe kammij pa osuw, ko mauren se kami oto teptepi tevi Kristo ji Atua pa osuw. ⁴ Ko ngok, batu mauren weretunen se kami evi Kristo kobbong. Ko daron nga Kristo pia-rremali, ko kami kele kaparremali tevi ni vajin rengen nosrövien.

Mauren se kami nga ñitra pusuw vajin

⁵ Ko ngok, kapbböt pini murru kami nga marivi ne ngatan ngel kobbong, erpe norman muoji nesevin, ko nesevin muoji norman, murrun nga sete muwokwok, ko armerreni nanu nga marsij nir. Ko nir arok-merrmerreni nanu jile, ko iok erpe arosuri nanu ngok nir arirpe atua ñinij nir. ⁶ Suri murrun ngok nir, lolaren se Atua pian rengen nir nga sete marosuri ni. ⁷ Ko kami kele, bonevis kamok-vijuri murrun ngok nir, daron nga kammaur renger e. ⁸ Ko lelingenok vajin, kami kapjiekie murrun jijle nga marsij, erpe lolaren, nolon nga mulolar, nalol nga mungasi jinibb, murrun nga marij ñisij tere

jinibb, rereren nga marsij nir. Setemun kapok-rij pirpok nabong pisan. ⁹ Ko sete kapkerkerasi lululweni kami. Suri kamla tweni pa mauren nga womu tevi murrun nen nga marsij nir, ¹⁰ ko kamuri lweni pa mauren nga mimerr ngok, nga Atua mokloli lululweni mimerr tetajer. Suri Atua emrreni nga kaprongwose ni p̄irres, ko nga kapsorsan tevi ni. ¹¹ Ko niko, setemun jinibb san orongwos puwra, ‘O, inu nuvi m̄eri Isrel ko san, ko nik kuvi jinibb ne vare ko san’, rreknga ‘O, inu nuan pa renge bae, ko nik setewor kuan re bae’, rreknga ‘O, inu nurongwose erres, ko nik kurrle nge nanu’, rreknga ‘O, inu nuvel sisarow, ko nik kuvi jinibb ne majingen’. Setemun kapok-rij pirpok, pijki. Suri Kristo elep asi nanu ngok nir, ololi arirpe nanu nawon kobbong nir. Ko ni elik pa renge jinibb sen nir.

Mauren se kami emerr

¹² Iow, erres, kamivi jinibb nga Atua mutobbto-bbue kami, kamivi jinibb on, kamivi jinibb nga Atua mimrreni kami. Ko niko, kapuri mauren nga mimerr nga murrun mirpel: kaprrormi jinibb nir, kaprrres tevir, nolo kami pian ngatan ko kapivi jinibb malum, ko norrorrmien se kami pipriv. ¹³ Kaptor totoni nolo kami, ko kaptelasi lululweni nololien se kami renge sel nga Numal m̄itlasi tweni pa nololien se kami ren. ¹⁴ Ko murrun ngok nir, kapjipjipteni tevi merrenien. Suri merrenien evi nanu san nga murongwos p̄ijipjipteni nanu jijle p̄irres. ¹⁵ Ko demat se Kristo puwowomu re nolo kami. Suri demat evi nanu nga milep nga Atua mimrreni puto renge

jinibb sen nir, nga markorti mirpe niben sansan. Ko kapok-wera ‘erres’ tevi Atua suri nanu p̄etp̄eti nir. ¹⁶ Ko nale se Kristo puto p̄etp̄eti re nolo kami. Ko kapvisviseni lululweni kami, ko kapsusur metu lululwi tevi kami renge norongwosien jile nga murrow. Ko kapok-lai nubo lele tevi Atua nga kapsurövi ni, nubo nir ne Sam renge Naul On, nubo nir nga kami kamkoji, ko nubo nir nga Nem̄in On m̄ilair tevi kami. Kaplai nubo ngok nir tevi nolo kami nga marok-wera “erres” tevi Atua tetajer. ¹⁷ Ko nanu p̄etp̄eti nga musuwsuw ngok nga kamwerai, ko nanu p̄etp̄eti nga musuwsuw ngok nga kamloli, ko kaplolir ko wor renge nise Numal Iesu. Ko kapok-wera tetajer ‘erres’ tevi Atua Tata renge nise Iesu mawos.

Murrun ne metka renge mauren nga mimerr

¹⁸ Kami nesevin nga kamlik ji diwen se kami nir, kaposuri diwen se kami nir. Murrun ngok osorsan erres kobbong renge kalesia nir. ¹⁹ Ko kami norman nga kamlesi nesevin, kapmerreni nesen se kami, ko sete kapok-sij tevir. ²⁰ Ko bipiwarreng nir, kapvijuri nale p̄etp̄eti se tata ko tasu se kami nir, suri Numal ornge erres re murrun nga mirpok. ²¹ Ko tata nir ko tasu nir, sete kaploli nату kami nir parungasi kami suri sel nga m̄iterter nga kamok-loli tevir, suri nolor tarok-vitan.

Murrun ne jinibb ne majingen nir ko numal ser nir

²² Jinibb ne majingen nir, kaposuri nale p̄etp̄eti se nir nga marivi numal se kami iel ngatan. Sete kapok-majing p̄irres re bbong daron nga numal

se kami marlik e, nga nir parmerreni nawone kami. Ko kapmajing ko wor renga nolo kami nga m̄irres p̄etp̄eti, suri kammetutue Numal Kristo. ²³ Ko nanu jile nga kamloli, kapmajinge tevi nolo kami, pirpe kammajing se Numal, sete se jinibb kobbong. ²⁴ Suri kamrongwose nga Numal pia-lai nowli kami tevi kami, nga marivi nanu nga marres nir nga ni m̄ilngir terai kami e. Erpe kamok-majing pa se Numal Kristo. ²⁵ Ko nir nga ma marok-loli m̄isij, ko Numal p̄ikle lweni tevi nir p̄etp̄eti pusorsan tevi nga marloli ngok. Suri Numal ololi osorsan tevi jinibb p̄etp̄eti nir, poro parivi jinibb nga marwelili rreknga jinibb nga marlelep.

4

Pol ela nale tevi nir

¹ Ko kami numal nir, kaploli murrun nga mumomsawos m̄irres tevi jinibb ne majingen se kami nir, pusorsan pirpok tevi nir p̄etp̄eti. Suri kamrongwos pae nga kami kele Numal se kami oto pa re melrin, ko ni pia-loli tevi kami pusorsan tevi nga kami kamloli tevi nir.

² Kami kapok-lot tevi nolo kami nga marterter tetajer. Kapkulkulu p̄irres renga loten se kami, ko kapok-wera ‘erres’ tevi Atua. ³ Ko kaplot suri kem kele, nga Atua p̄itasi metali nga nabwera tweni nosp̄en suri Kristo, nga bonevis muto teptepi. Ko inu nulik renga naim ne nekaien le ngel suri numajing ren. ⁴ Ko kaplot suri nga inu berij p̄irres, puloli nale nen parm̄erer. Iok pirpe pusorsan p̄imawos tevi nga inu bololi.

⁵ Kapok-loli murrun nga mivijuri norong-wosien tevi jinibb ne vare nir. Kaploli womue ãirres ngarr tevir, nabong tarasasi nawon.

⁶ Kapok-rij ãirres tevi nir tetajer, puloli nir parir nga parunge nale se kami. Ko kaprongwose ãirres vajin lut nga kaprij weli jinibb jile nir parto suri.

Nosþen ne Pol

⁷ Tikikas pia-suþe suri nosþen nek tevi kami. Ni evi niaken se kerr san nga rrammerreni, ko nga mokmajing korti lilane ãirres tevi inu reнге majingen se Numal. ⁸ Nukoni vinuk ji kami suri nanu ngel le, nga puloli kaprongwose nosþen ne kem, ko nolo kami parmold suri ãirres. ⁹ Ko bokoni kele Onesimas pipitevi ni. Ni kele evi niaken se kerr san nga rrammerreni, ko nga mokmajing lelane ãirres, ko evi kami san. Nuru ngok porloli kaprongwose nanu jile nga marok-pelpelari iel.

Bongsi nale se Pol

¹⁰ Aristakas le nga ãilik reнге naim ne nekaien ngel owra ‘erres’ tevi kami, ko Mak kele nga mivi tasi Banapas san, ni kele owra ‘erres’ tevi kami. Nuwra rrurrngi pa tevi kami nga poro ni pivinuk, ko kapa-te kai ni. ¹¹ Ko ãerel nga nisen muwaji Iesu nen nga marverus kele nisen tuwen Jastas, ni kele owra ‘erres’ tevi kami. Nir itul ngok kobbong reнге ãeri Isrel nir arpitevi inu reнге majingen ne batun vanu se Atua, ko arok-loli nolok erres. ¹² Ko Epapras kele, nga mivi kele kami san, owra ‘erres’ tevi kami. Ni evi jinibb ne majingen se Iesu Kristo, ko okrat tetajer

suri kami renge loten sen nga kaptur p̃iterter jile, kaptera jile, ko nga kaploli marongen p̃etp̃eti se Atua. ¹³ Nurongwos bowrai nga ni mokp̃elak milep suri kami, ko suri nir nga renge Laotisia, ko nir nga renge Ierapolis. ¹⁴ Ko dokta Luk le, nga rrammerreni ni, ko Demas kele, orwera ‘erres’ tevi kami. ¹⁵ Kapwera ‘erres’ tevi tasi kerr nir nga marlik Laotisia, ko tevi vinok Nimpa, ko tevi kalesia nir nga marok-korti renge naim sen. ¹⁶ Ko poro nga para-eve jile naul ngel tevi kami, kaplai kele van para-eve kele tevi kalesia nir nga renge Laotisia. Ko naul suk nga m̃elai tevi kalesia nir renga Laotisia, kami kaplai vinuk ko kaploli para-eve tevi kami. ¹⁷ Ko kapwerai tevi Akipas, ‘Kupmetmet p̃irres nga kupmajing jile majingen ngok nga Numal m̃ilai tevi nik.’

¹⁸ Inu mawos vajin, nula pensil ji m̃er nga mok-uli tweni nale suk ngel nir, ko nuli vajin “erres” suk ngel tevi kami. Erres kaprrorrmi inu renga dil delrrurr nga marserek e. Nurongwos mae, merrenien se Atua puto tevi kami. Nuwra ‘Remse kami’.

Naul On Nga Mimerr Uripiv
The New Testament in the Uripiv language of
Vanuatu

copyright © 1996 Wycliffe Bible Translators

Language: Uripiv (Uripiv-Wala-Rano-Atchin)

Dialect: Uripiv

Translation by: WBT

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 11 Nov 2022 from source files dated 22 Nov 2019

96303ce7-aa0a-513c-862d-415957a542e1